

劉兆祐博士主編
中國史學叢書三編

皇

明

寶

訓

(五)

臺灣學堂書局印行

劉兆祐博士主編
中國史學叢書三編

皇明寶訓
(五)

臺灣學生書局
印行

大明憲宗純皇帝寶訓卷之二

光祿大夫柱國少傅兼太子太傅禮部尚書武英殿大學士臣呂本謹校

南京禮部祠祭清吏司郎中臣陳治本

南京兵部職方清吏司主事臣朱錦謹閱

南京工部虞衡清吏司郎中臣呂胤昌

寬宥

○成化三年七月甲子赤斤蒙古衛指揮敢班初數侵掠邊境邊將以計致之京師請安置遠方

上以夷狄不足較特寬宥之仍命譯者諭之曰爾等數擾邊疆揆之國法在所必誅縱用輕典亦宜編置南徼以懲不肅今姑貸爾仍加優恤爾其體朕至意各安職業

三
明
言
一
分
二
表
一
以為外禦若恃恩再犯決不輕恕

○成化五年七月乙巳建州左衛都指揮佟那和劉等奏乞命都督董山子脫羅李古哈納姪完者禿各襲其父伯之職事下兵部請裁處

上由虜酋背恩忘義罪當族滅今首惡已誅餘皆悔過向化朕體

上天好生之德悉加寬宥脫羅等既衆人奏保其授脫羅都指揮同知完者禿都指揮僉事令統束本衛人民依前朝貢再犯不貸

○成化十年七月丙子巡撫山東左僉都御史牟倬奏濮州所獲乘飢作亂賊首董現房勝其黨十餘人今皆瘦

死惟勝弟教依律擬斬今詳赦初不同謀亦未嘗拒捕
止因同居連坐情實可矜

上曰民以飢荒欲倡亂有司不能撫治例以常律處死朕
甚憫焉同居者既不預謀宜宥其子杖而戍邊已死者
家屬財產悉宥勿籍

○成化十四年八月壬辰直隸永年縣民冀祥呂子良犯
私鑄銅錢罪論斬其親鄰俱言二人皆父母年老無他
兄弟侍養特以艱窘之故誤罹刑憲御史以聞都察院
議人緣艱窘犯法以為情有可矜則人爭相視倣何所
不為但所犯非常赦所不願而父母年老無人侍養又
律所載宜取旨裁決

○成化十九年二月丙子延綏右叅將郭鏞與虜戰三里塔擒斬有功是日別有虜犯其境大栢油川鎮守巡撫等官請罪鏞於是鏞上奏自辯

上曰三里塔栢油川皆郭鏞分守之地顧此失彼其勢不能兩全况既出戰與他閉門畏縮者不同設更罪之不己甚乎姑從寬宥俾知感激庶可勵其異日立功之志○七月乙未大同總兵官許寧等奏分守左叅將劉寧左監丞石巖自宣府移守陽和又二日虜犯其境亦係失機當罪兵部言二人移守甫及信宿罪難槩論

上曰兵部議是士卒非素所拊循則不識將意難以爲用寧等頃自宣府移守陽和甫二日爾號令未行威愛未

立部下之勇怯地利之險易俱未究知而因一挫即以軍法定罪可謂不酌人情不較事勢而欲以服人心其難矣俱貸之令勉圖後功以贖前罪

○十月丙子廣西右叅將廣東都指揮同知歐盤初分守柳慶寇至失利應坐充軍律至是鎮守等官盛稱其威令大行及其他調度皆可稱道乞從輕處治以激勵邊將上曰古人謂使功不如使過賞罰操縱自有權度所以鼓舞衆志而使人樂於效命也歐盤既功可贖罪宜從守臣之言姑宥之令復舊任悉心殺賊以圖後功

○成化二十年九月己亥哈密都督罕慎克復舊城時執土魯番酋長哈哈械送甘州至是請釋之

上曰脅從罔治古之法也矧在夷狄固當略之哈哈可遣
歸本國仍令傳諭其國王孫女阿黑察及大小諸酋自
後務遠鄰保族毋相殘以干國法

○成化二十三年七月甲辰鴻臚寺寺丞孫繩宣讀有誤
為御史所劾

上宥之且曰鴻臚寺官宣讀無大失者後勿劾

明斷

○成化元年十一月癸亥左軍都督過興鎮守廣西召還
道湖廣祁陽縣怒知縣李翰接應夫船不時令子得隆
率部卒拽翰及其子釗榜掠無完膚俱死河下而興亦
以疾死于道翰妻入愬于朝事下法司差官勘實得隆

伏罪其毋擊登聞鼓稱寃

上以其妄愬不聽命即誅之

○成化二年六月癸丑錦衣衛正千戶陳珏初以畫藝得官至是卒無子其姪錫請襲職兵部以非軍功請勿許上曰官以酬功珏畫藝非軍功比况又無子一時暫假之恩豈後世常行之典勿令襲是

○成化六年正月乙酉巡撫陝西都御史馬文升王銳各奏去冬虜入延綏葭州保安等縣寧塞安邊等營殺掠人畜焚燬室廬因劾守備都指揮陳英等閉門坐視守堡指揮盛銘隋能等捍禦無策且言知州孟泰等不先移民入堡亦當治罪

上曰州縣官不係統兵守備之任且方給軍需難於槩問
若邊將弛備之罪良由法令不振而然陳英等宜行巡
按御史究治其有功勞可贖者仍具實來聞

○四月丙子南京守備等官成國公朱儀等奏南京有盜
王阿童為盜二十餘年已經五犯皆以犯在赦前得免
今復被獲如仍擬初犯恐益長其惡

上曰赦所以許人自新而小人乃倚赦為姦是豈可縱夫
辟以止辟虞周之刑也王阿童其審實處決今後問擬
竊盜仍以赦前後通論三犯其著為令

○成化十三年九月庚辰朵顏衛都督阿兒乞蠻等乞糧
上以其多詐不允

○成化十九年十一月辛丑巡撫山西右都御史邊鏞奏
國家西北藩籬先大同而代州鴈門次之今大同既宿
重兵而鴈門兵獨少可於代州立帥府設總兵如大同
之制兵部尚書張鵬覆議以為不必立

上曰將得其人雖一旅足為萬里之長城非其人雖重兵
不足為北門之鎖鑰其如兵部議已之

正風化

○成化五年四月乙丑御用監左監丞龍閏娶南和伯方
瑛妾許氏為妻事覺

上曰在昔帝王以內官給事內庭以其絕生道無外覲也
今閏在外娶妻何異常人其即離異閏仍送司禮監處

治之

○成化十一年十二月辛卯國子監祭酒周洪謨言洪武間學規嚴整士風忠厚頃來大不如昔奏讀紛紛欲壞累朝循次撥歷之規且群造謗言宜加禁革

上曰太學者賢士之所關也今諸生所為若是則禮義蕩然矣後將何賴禮部其申明洪武間學規備榜戒諭之

○成化八年九月甲辰通城王府儀賓郭成以文卒於寧遠衛啟王欲奔喪不從乃潛歸湖廣按察司劾其罪

上曰聞親喪奔赴人子迫切至情有不容已者非有他過其宥之

○成化十八年十一月乙巳巡撫河南都御史孫洪請禁

諸王府以親屬為婚姻

上曰婚姻人道之始禮之大者不可不謹矧藩府為朝廷親屬宜為朕遵行以先天下著為令

○成化二十一年四月己未訓導鄭璟言浙江溫台處三府人民所產女子慮日後婚嫁之費徃徃溺死殘忍不仁莫此為甚乞令所司榜諭下都察院議此弊不獨三府延及寧紹金華并江西福建南直隸等處亦然宜悉榜諭如璟言

上曰人命至重父子至親今乃以婚嫁之累戕恩敗義俗之移人一至于此此實有司之責自後民間婚嫁粧奩務稱家有無不許奢侈所產女子如仍溺死者許隣里

三
日
言
一
方
二
三
舉首發成遠方

崇儒

○成化元年四月丁丑朔孔子五十六代孫克晌以子姓
繁衍日用不給乞蠲田租

上曰孔子有功於萬世其子孫在所優恤命有司減其租
○成化四年二月辛亥六科給事中十三道監察御史皆
言掌太常寺事禮部尚書李希安發身道士不宜令預
經筵

上曰經筵之設所以講明道學關係甚重故侍從皆用文
學之臣希安既非儒流可罷侍班但令供禮官之職
○成化五年二月庚戌大學士彭時等以衍聖公孔弘緒

犯法得旨械京問理上奏弘緒貪淫暴虐依法提問固所當然但望

皇上念先師扶世立教之功寬其桎梏待取至京議奏處治蓋律其八議弘緒正合應議之例

上曰宣聖子孫朕素所優禮今弘緒自罹于法殊玷家聲卿等欲俾其散行就逮雖非所以處弘緒而於待孔氏之道則得矣其湏繫之

○成化十二年七月辛亥國子監祭酒周洪謨言孔子冕服已用天子之禮宜增籩豆為十二佾舞為八則禮樂相稱

上曰尊崇孔子乃朝廷盛典宜從所言其籩豆佾舞俱如

數增用仍通行天下悉遵此制

○成化十八年十一月壬戌顏氏六十一代孫襲翰林院五經博士顏公鉉奏顏子廟缺人灑掃請如孟氏例撥賜上曰國朝祀典二廟並隆孟氏既有廟戶而顏氏獨無誠為缺典其令有司如孟氏數給與之

○成化二十二年十一月乙卯禮部以博士顏公鉉請脩顏子廟覆奏

上曰顏子孔門高弟道德可仰身先配享而家廟不脩可乎其令有司以脩孔廟工役重為脩葺

興學

○成化元年三月丁巳

上視國子監躬謁先師孔子行四拜禮幸彞倫堂武官都督以上文官三品以上及翰林院學士皆賜坐祭酒司業坐講賜茶明日賜祭酒司業等官及孔顏孟三氏子孫襲衣諸生寶鈔越三日賜祭酒司業及諸生勅曰朕惟國家建學育才用圖治理儀文之備視古加隆而太學乃聚教天下之士風化自是而出所關尤重肆我祖宗列聖興崇表勵先後一心茲朕嗣統紀元之初式遵成憲躬臨太學祇謁先師孔子勸勵師生顧惟經邦輔治非學不能成德達才非教不可而進為之方舍六經孔子之道奚法焉爾師生尚其勉率慎由善乃教端乃學窮理脩身務臻其極庶幾四方顯然嚮風予一人收